



Fylkesmannen i Sogn og Fjordane

Sakshandsamar: Gunn Helen Henne
Telefon: 57643140
E-post: fmsfghe@fylkesmannen.no

Vår dato
03.08.2018
Dykkar dato
03.08.2018

Vår referanse
2018/2338- 434.11
Dykkar referanse

Øystein Osland, på vegner av
Guddal beitelag,
Flekke beitelag
Fjorden og Dale beitelag
Gaular beitelag

Avslag på søknad om ytterlegare forlenga skadefellingsløyve på ulv mellom Dalsfjorden og Sognefjorden

Dei fire beitelaga i Guddal, Flekke, Fjorden og Dale, og Gaular søker om forlenga skadefellingsløyve på ulv i dykkar beiteområde. Fylkesmannen finn ikkje grunnlag for å gje forlenga løyve.

Bakgrunn

Fylkesmannen har gjeve løyve for skadefelling av ulv i området mellom Dalsfjorden og Sognefjorden tidlegare i sommar. Først den 20.-26. juli, og så ei forlenging frå 26. juli til 1. august. Siste fellingsløyve gjekk ut 1. august kl 22.00. Vedtaka er tilgjengeleg på Miljøvedtaksregisteret (www.miljovedtak.no) for meir utfyllande informasjon om lovgrunnlaget og våre vurderingar for å gje løyva.

Løyve vart gitt etter påvist ulveskade på mange dyr lenger nord (i Naustdal) nokre veker tidlegare, og dokumentert skade frå ulv på eitt dyr i Fjaler den 17. juli. Det er seinare innhenta ein ekskrementprøve til DNA-analyse den 22. juli i Gaular, og det er gjort ein observasjon av mogleg ulv den 25. juli i Hyllestad. Desse opplysningane er tilgjengeleg på Rovbase (www.rovbase.no).

Etter dette er det i følge SNO ikkje gjort nye observasjonar av ulv, eller funne nye kadaver i området. Resultatet frå DNA-analysen er ikkje klar, dette ventast i neste veke.

Beitelaga ønskjer i søknad frå i dag, 3. august, likevel at skadefellingsløyvet vert forlenga. De viser til at skadepotensialet i eit område med så mange dyr på beite er stort. Til saman er det over 7800 småfe og fleire hundre storfe på beite her. Det er ikkje oppgitt kor lenge de ønskjer å forlenga løyvet.

Vurderinga til Fylkesmannen

Dersom Fylkesmannen skal iverksette skadefelling av rovvilt, jf. rovviltforskrifta §9, skal det mellom anna takast omsyn til

- a) *områdetets betydning som beitemark*
- b) *skadenes omfang og utvikling*
- c) *potensialet for fremtidige skader*
- d) *muligheten for å gjennomføre forebyggende tiltak.*

I våre tidlegare vedtak om å gje skadefellingsløyve på ulv i dette området er det lagt stor vekt på skadepotensialet for beitedyr og vurdert at det var sannsynleg at det fanst ein skadegjerande ulv i området.

Ettersom det ikkje har vore rapportert om nye skader sidan 17. juli, eller gjort nye sikre observasjonar av at det framleis er ulv i desse beiteområda, er det ikkje så sikkert at ulven framleis er i området. Dermed vert potensialet for framtidige skader i dette området vurdert som minka no. Grunnlaget for å gje skadefellingsløyve er etter vår vurdering ikkje lenger til stades.

Dersom nye skader oppstår, eller nye bekrefta observasjonar av ulv vert gjort, vil saka raskt kunne vurderast på nytt av Fylkesmannen.

Konklusjon

Fylkesmannen gjev avslag på søknaden om forlenga skadefellingsløyve for ulv i området mellom Dalsfjorden og Sognefjorden.

Klagerett

Partane i saka og andre med klagerett etter forvaltningslova kan klage over avgjerda innan tre veker etter at avgjerda er motteken. Ein eventuell klage bør grunngjevast og skal rettast til Miljødirektoratet. Klagen skal sendast til Fylkesmannen, som anten kan ta klagen heilt eller delvis til følge, eller sende han til Miljødirektoratet for endeleg avgjerd.

Med helsing

Gunn Helen Henne
fungerande fylkesmiljøvernssjef

Heidi Sandvik
seniorrådgjevar

Brevet er godkjent elektronisk og har derfor ikkje underskrift.

Kopi til:

Statens naturoppsyn
Fjaler kommune
Hyllestad kommune
Gaular kommune
Høyanger kommune